



Blagodati povratka u školske klupe (Meka)

Hatib: dr. Abdullah ibn Avad el-Džuheni

25. muharrem 1443. po Hidžri / 3. septembar 2021.

Hvala Allahu, Čijom se dobrotom upotpunjavaju dobra djela, i Koji daje i plemenit je, i Koji obilno daruje, i Koji smrt i život daje, i Koji na smijeh i plač navodi. Njemu pripadaju ponos i gordost na nebesima i na Zemlji, On je Silni i Mudri. Donosim salavate i selame na Miljenika, kojim je Allah uputio srca, neka su na njega Allahova milost, blagoslov i spas, i na njegovu porodicu i ashabe do Sudnjeg dana. Bojte se Allaha, Uzvišenog, o muslimani, budite svjesni Njegovog nadzora, pokoravajte se Njegovoj naredbi i nemojte Mu biti nepokorni. “Mi smo onima kojima je data Knjiga prije vas, a i vama, već zapovjedili da se bojite Allaha.” (En-Nisa, 131) Bogobojažnošću se postiže Allahova zaštita i uspjeh, bogobojažnost vodi ka izlazu iz svakog iskušenja, uzdiže na visoke stepene, uvodi u Džennet i spašava od Vatre. O vjernici, zahvaljujemo Allahu, Dobročinitelju, Blagodarnom, na velikim blagodatima koje nam je olakšao i kojima nas je obdario, a jedna od tih blagodati jeste blagodati koju svjedočimo ovih dana – pohađanje redovne nastave i povratak učitelja, učiteljica i djece u škole, koledže i univerzitete. Zaista je to lijep prizor koji je sve nas obradovao. Da, to je prizor ponosa i počasti. Uzvišeni kaže: “Allah će one, među vama, koji vjeruju i kojima je dato znanje uzdignuti za stepene. Allah dobro zna ono što radite.” (El-Mudžadela, 11)

Znanje je najčasnija stvar kojoj čovjek može težiti, najvrednije što se može tražiti i najkorisnija opskrba. Znanje je zaostavština i naslijeđe vjerovjesnika, život za ljudska srca, svjetlost za oči, lijek za grudi, vježba za naš um, slast za dušu, utjeha za usamljene, putokaz za zbunjene. Znanje je vaga kojom se mjere riječi, postupci i stanja. Ono nam pomaže u spoznaji i obožavanju Allaha, spominjanju, hvaljenju i veličanju. Allah je učene ljude uzeo za svjedoke u najčasnijem svjedočenju, svjedočenju tevhida – Njegove jednoće, i njihovo svjedočenje spomenuo je u





Kur'anu, uz Svoje i svjedočenje meleka, čime je potvrdio njihovu pravednost, jer se od nepravednih ne prima svjedočenje. Znanje je Allahov svjedok na Zemlji, i svjetlost među Njegovim robovima i njihov putokaz i vodič ka Džennetu. Uzvišeni kaže: “Allah svjedoči da nema drugog boga osim Njega – a i meleki i učeni – i da On postupa pravedno. Nema boga osim Njega, Silnog i Mudrog!” (Ali Imran, 18)

O muslimani, znanje i briga o njemu spada u nužne interese i elementarne, individualne i kolektivne potrebe jednog društva. Znanje je uslov napretka naroda i država, a bez znanja nema ni popravka ni napretka. Potreba ljudi za znanjem veća je od njihove potrebe za hranom i vodom, jer su hrana i voda potrebni nekoliko puta na dan, a znanje je potrebno onoliko koliko je udisaja i izdisaja. Potrebno je, na početku nove školske godine, podsjetiti naše učenike i učenice na poštivanje adaba traženja znanja, a prvi od tih adaba jesu bogobojaznost, iskrenost, strpljivost, podnošenje teškoća, širokogrudnost, poniznost, čuvanje od oholosti i samodopadljivosti, kao i poštivanje učitelja kroz pomno slušanje i učtivo obraćanje. Moja poruka tebi, učitelju i učiteljice, jeste da se bojite Allaha u pogledu vašeg odnosa prema učenicima i učenicama, koji su vam povjereni u emanet, i da slijedite primjer prvog učitelja u ovome ummetu, vjerovjesnika Muhammeda, sallallahu alejhi ve sellem. On je bio najbolji učitelj, brižan, milostiv, blag i saosjećajan. Olakšavao je, a nije otežavao, okupljao je, a nije rastjerivao. Bio je nasmijan i uvijek vedar i radostan. Slijedite njegov primjer! Počašćeni ste istom misijom koju su imali vjerovjesnici i poslanici i to vas obavezuje na ispunjavanje vaših učiteljskih i odgojnih zadataka. Molim Allaha da nas uputi na Pravi put i na ono što je ispravno.

Moja poruka očevima i majkama je da se boje Allaha i da se brinu o onima koje im je On povjerio. Poslanik, sallallahu alejhi ve sellem, rekao je: “Allah će svakog čovjeka pitati o onome što mu je povjerio, čuvao on to ili zapostavio, sve dok ga ne bude pitao za članove njegove porodice.” (Ibn Hibban sa dobrim senedom) Podučite svoje sinove i kćeri, Allah vas čuvao, pravima učitelja i učiteljica, prije nego što sjednu u kružoke znanja. Zasadite u njihova srca ljubav prema znanju i učenima, i poštovanje prema učiteljima i učiteljicama. Objasnite im da je stjecanje znanja pobožno djelo





koje približava Allahu i kojim se postiže Njegovo zadovoljstvo. Uzvišeni kaže: “ I bojte se Allaha – Allah vas uči, i Allah sve zna.” (El-Bekara, 282)

O muslimani, bojte se Allaha onako kako Ga se treba bojati, i čvrsto se držite principa la ilahe illallah, jer to je najjača veza. Čuvajte se grijeha, jer vaša tijela ne mogu izdržati vatru. Budite ponizni pred Allahom, jer onoga ko se ponizi pred Allahom, On će uzvisiti, a onoga ko se bude oholio pred Allahom, On će uniziti. Čije sjeme bude bogobojaznost, ubrat će lijepe plodove. Znajte da je najljepši govor Allahova Knjiga, a najbolja uputa je uputa Muhammeda, sallallahu alejhi ve sellem. Najgore stvari u vjeri su uvedene nove stvari u vjeru. Svaka nova stvar je novotarija, svaka novotarija je zabluda, a svaka zabluda vodi u Vatru. Allaha molimo da sve nas opskrbi korisnim znanjem i dobrim djelima, i da uputi naše sinove i kćeri, i podari im pomoć, dobro, uspjeh i spas, i da nagradi učitelje i učiteljice, očeve i majke najboljom nagradom, i pomogne ih u izvršenju njihove misije.

O vjernici, Uzvišeni Allah naredio nam je da donosimo salavate i selame na Allahovog Poslanika, pa je rekao: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!” (El-Ahzab, 56) Poslanik, sallallahu alejhi ve sellem, rekao je: “U čijem prisustvu budem spomenut, neka donese na mene salavat, Allah donese deset salavata na onoga ko na mene donese jedan salavat.”

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

